

11. Transcriptie bij afbeelding Genesis over Sara, met waarschuwing in de marge
(kleurkatern VII, nr. 2, t.o. pag. 216, nr. 2)

herde out es salic ernsticheit gheuen
ter weeldicheit ende die here seide
tot abraham. Waer om soe loech
sara segghende sal ic die quene ben
waerlijc ghebaren. es gode iet pijnlijc
te doene Alsoe ic gheseit hebbe soe
salic comen te di te desen seluen tijde
bliue ic te liue ende sara sal enen sone
hebben. sara loechenes ende seide ic en
loech niet om dat si van vresen veruaert
was Ende die here seide en es alsoe
niet maer du loeghes **Glosa et cetera**

(in marge: Dese glose en salmen niet lesen)

Sara hadde ghelaten te gheschien
wijflicheit dat was die menstrue dat
machmen heeten der vrouwen maent
suueringhe want aristotilus die seit
inden boeke vander vrouwen heyme-
licheit dat die coutste man die noeyt
ghewert oft wesen mach bi natueren
heeter es dan theetste wijf die we-
sen mach Ende om dat die vrouwen
mits hare coutheit niet en mach met
natuerliker hitten verbeteren haer ouer
tullighe humoren. soe moetense alle

maende hebben een sueringhe daer
af van dier tijt *dat* si soe out sijn dat
si bi natueren kinder draghen moegen
oft *niet* langhe daer nae al tot dier
tijt *dat* si soe out sijn *dat* si nymmeer kin-
der draghen en moeghen Ende alsijt iet
draghen ouer die maent soe worden
sire swaer af *ende* dicke seer siec. de-
se sueringhe losen si ten natuerliken
lede *ende* het es al *dat* quaetste venijn
ende donsuerste bloet *dat* si ouer hon
hebben Ende waren vrouwen soe cout
dat sijs *niet* ghelosen en mochten si sou-
denre die doot af laden Alle mannen
es *verboden* *dat* si *met* hon *niet* wesen en
selen ter tijt van deser sueringhen